



SIUMUT

INATSISARTUNI ILAASORTAATITAT / LANDSTINGSGRUPPEN

13.09.2011

Inatsisartut suleriaasiat § 36 immikkoortoq 1 naapertorlugu Naalakkersuisunut imaattumik apeqquteqarniarpunga.

Naalakkersuisunut Apeqqut:

1. Nammieq pigisaminnik piginneqatigiilluniluunniit illuutileqatigiinni angerlarsimaffilit, nappaammik ilungersunartumik eqorneqarsimaneq pissutigalugu sulisinnaajunnaarallarneranni, inigisaminnut akiligassatigut ikiorserneqarsinnaannginnerat, innuttaasunik assigiinngisitsinertut Naalakkersuisunit isigineqarnerluni?
2. Qulaani ajornartorsiutip taasama allanngortinneratigut, tassa Pisortanit ikorsiisutit pillugit Inatsisartut peqqussutaat nr.15, 20.november 2006-eersoq aqqutigalugu, qulaani pineqartut illugisaminnut akilersuutinut kingusinnerusukkut taarsorsorlugit utertinneqartussanik ikiorserneqarsinnaalernerisigut, allaffissornikkut aningaasatigullu kingunerisinnaasai Naalakkersuisunit ilisimaneqarpat?

(Inatsisartunut ilaasortaq Malik Berthelsen, Siumut)

Tunngavilersuut:

29.december 2010 apeqqutigisannut Naalakkersuisut ilaatigut imatut akivusi, "Innuttaasoq, piginneqatigiilluni illuutileqatigiinni imaluunniit nammieq pigisamini inigisaqaruni, ineqarnermut akiligassanut matussutissanik aningaaserivimmuit atorniartariaqarpoq...." naggaserlusiullu aamma imatut, "Ikorsiissutit taamaattut pisortanit utertitassanngorlugit ikorsiissutaasinnaanngillat".

Inuaqatigiinni ilisarnaatigaarput nammaqatigiinneq. Paasinnittaasera uanga malillugu nammaqatigiinneq tassaavoq peqqissut pisinnaasut tamarmik ikioqatigiillutik nammaqatigiinnerat, imaanngitsoq innuttaasut eqiasuinnerit kisimik nammattuullutik. Taamaatumik nammaqatigiinnertut taaneqarsinnaanngilaq namminerisaminnik illuutillit napparsimalernerini illumut akilersuutinut ikiuussinnaannginneq, akerlianik innuttaasunik assigiinngisitsinertut taasariaqarpoq.

Inummi napparsimasoq nappaamminik aninguinissaminik sorsuuteqartoq suli allamik qaavatigut naalliuutissaanik tuneqqiinnarsinnaanngilarput, oqarfialugu, aningaaserivimmuit atorniarniarit!

Kialluunniimmik aningaaseriviit ingerlatsinerannut ilisimasaqalaartut nalunngilaat aningaasat atukkamik qaavatigut aamma allanik imaašiallaannaq atorniarniartoqarsinnaanngitsoq, ingammik qaammatini arlalinni sulisinnaajunnaarallarsimagaanni taarsigassarseqqissinnaaneq ilimagineqarsinnaanngilaq.

Peqqussutip qulaani taasama allanngortinneratigut, tassa kikkut tamarmik illugisaminnut akilersuukkallarneqarsinnaalernerisigut, aningaasatigut qanoq annertutigisumik kinguneqassanersoq qularnaatsumik oqaatigineqarsinnaagunangikkaluartoq, kingunerisinnaasai, allaffissorneq innuttaasunillu kiffartuussineq ilanngullugit Naalakkersuisunut nassuaatigeqqugaluarpakka.